

LEKSYON 7

**MAY
KABULIG
IKAW**



Ang Matun-an Mo Sa Sini Nga Leksyon

**Ang Balaan nga Espiritu Amo ang
Imo Kabulig**

Ang Bunga sang Balaan nga Espiritu

Ang Paggawi sa Espiritu

**Ang Gahum sang Balaan nga Espiritu
sa Imo**

Mga Hiyas sang Espiritu

Ang Balaan nga Espiritu Amo ang Imo Kabulig

Ayhan sa sini nga tion nakahunahuna na ikaw: “Daw mabudlay na ini para sa akon. Ambot kon makasangkol ako sa pagkabuhi sang Kristohanon nga kabuhi. Kadamo sang bulohaton nga daw halos indi nakon madumdoman ang tanan, ilabi na gid ang pagbuhat sa ila.”

Indi ikaw dapat magkaluya. Indi ina subong kabudlay sa imo ginahunahuna tungod kay ang Balaan nga Espiritu nagkari sa pagbulig sa imo. Ang Kristohanon nga kabuhi indi kay mga tulomanon lamang kay wala ini napasandig sa imo kaugalingon nga pagpanikasog. Amo ini ang pagbaton sang ginhimo sang Dios sa imo kag ang pagpapuyo sang Balaan nga Espiritu sa imo kag ang pagsunod sa Iya.

Buhata Ini

1. Sin-o ang kabulig nga ginpadala sang Dios sa pag-upod sa imo sa tanan nga tion?

- a) ang pari
- b) ang pastor
- k) ang Balaan nga Espiritu

2. Ang kabuhing Kristohanon amo

- a) ang mga tulomanon nga kinahanglan tumanon.
- b) ang pagpanikasog nimo agud magmaaayo
- k) ang pagpapuyo sang Balaan nga Espiritu sa imo kabuhi kag ang pagsunod sa Iya.

Sabat: 1. k) ang Balaan nga Espiritu. 2. k) ang pagpapuyo sang Balaan nga Espiritu sa imo kabuhi kag ang pagsunod sa iya.

Ang Balaan nga Espiritu yara sa bisan diin nga duog sa isa ka tion. Sang diri pa sa duta si Ginuonng Jesus, makakadto Sia sa isa lamang ka duog sa isa ka tion. Sang pagbalik Niya sa langit, ginpadala Niya ang Balaan nga Espiritu sa pag-upod sa mga Kristohanon, sa pagpuyo sa aton, sa pagtuytoy kag sa pagbulig sa aton mga gumontang.

Kag ako magapangayo sa Amay kag magahatag Sia sa inyo sing isa pa ka Mananabang, agud nga mag-upod Sia sa inyo sa gihapon. Apang ang Mananabang ang Espiritu Santo, nga ipadala sang Amay sa Akon Ngalan, magatudlo Sia sa inyo sang tanan nga butang, kag magapahanumdum sa inyo sa tanan nga akon ginsiling sa inyo. Juan 14:16, 26.

Buhata Ini

3. Nagkari ang Balaan nga Espiritu sa
 - a) pag-upod sa tagsa ka mga Kristohanon sa tanan nga tion
 - b) pag-upod sa pila lamang ka mga Kristohanon

Sabat: 3. a) pag-upod sa tagsa ka mga Kristohanon sa tanan nga tion.

Ang Bunga sang Balaan nga Espiritu

Ang pagpuyo sang Balaan nga Espiritu sa imo kabuhi nagapakita sang resulta nga ginatawag nga bunga sang Espiritu. Nagahatag Sia sa imo sang handum sa paghimo sang husto nga butang. Kag nagahatag man Sia sa imo sang kusog sa paghimo sing maayo. Samtang ginatugotan nimo Sia sa pagtuytoy kag sa pagbulig sa imo sa sini nga paagi, ginadihon man Niya sa imo ang makatilingala nga paggawi nga Kristohanon. Ang pamatasan, panghambal kag paggawi nimo nga maayo, kaangay sang matam-is nga prutas. May kalipay ang imo panimalay kag mga abyan sa imo pagpakig-upod sa ila. Ilabi sa tanan, ining bunga sang Espiritu magalipay sa aton Amay nga Langitnon.

Apang ang bunga sang Espiritu amo ang gugma, kalipay, paghidaet, pagbatas, pagkalolo, pagkaayo, pagkatutom, pagkama-painubuson, pagpugong, sang kaugalingon. Mga Taga Galacia 5:22, 23.

Paagi sini ginahimaya ang akon Amay, nga magpamunga kamo sing madamo.

Juan 15:8.

Buhata Ini

4. Ang "bunga sang Espiritu" nagapatuhoy sa
- a) mga naluwas nga kalag sa pagbantala sang Pulong sang Dios.
 - b) maayo nga kinaiya nga ginapamunga sang Balaan nga Espiritu sa aton kaugalingon.

5. Sauloha ang Mga Taga Galacia 5:22, 23.

Sabat: 4. b) maayo nga kinaiya nga girapamunga sang Balaan nga Espiritu sa aton kaugalingon

Ang Paggawi sa Espiritu

Natural para sa aton ang maghimo sang aton naluyagan. Amo ini ang masami nga himuon sang tawhanon nga kinaugali. Luyag naton buhaton ang makalipay lamang sa aton kaugalingon, sang sa buhaton ang nahibaloan naton nga maayo. Amo ini nga kinahanglan ang pagpamati sa tingog sang Balaan nga Espiritu kon nagasugo Sia sa paghimo sang kabubut-on sang Dios kag sa pagpakita sa aton sang dalan nga matarung.

Apang nagasiling ako, maggawi sa Espiritu kag dili pagtumana ang kailigbon sang unod. Kon nagakabuhi kita sa Espiritu maggawi man kita sa Espiritu. Taga Galacia 5:16, 25.

Buhata Ini

6. Ang buot silingon sang mga pulong sa Mga Taga Galacia 5:16 nga “dili pagtumana ang kailigbon sang unod” amo nga
- a) indi mo maangkon ang imo mga kinahanglanon.
 - b) magkabuhi nga indi madinalagon
 - k) mag-angkon ikaw sing kadalagan batok sa tawhanon nga kina-

ugali nga buot magbuhat sang
kaugalingon nga kagustohan.

Sabat: 6. k) mag-angkon ikaw sing kadalagan batok sa tawhanon nga kinaugali nga buot magtuman sang kaugalingon nga kagustohan.

Magatuytoy kag magapabakod sa imo ang Balaan nga Espiritu sang Dios apang indi Sia magpas-an sa imo palangit. Nagalakat ikaw sa duha nimo ka tiil. Kag kinahanglan magbuylog ikaw sa Balaan nga Espiritu kag tugotan mo Sia sa pagtuytoy sa imo. Amo ini ang ginatawag kon kaisa sang Biblia nga maggawi sa espiritu. Ginahimo na nimo ini kon nagabasa ikaw sang Biblia kag ginabutang sa buhat ang ginatudlo sini.

Buhata Ini

7. Ang paggawi sa Espiritu nagakahulogan sang

.... a) pagkabuhi nga masinadyahon adlaw-adlaw.

.... b) pagsunod sa pagtuytoy sang Balaan nga Espiritu sa adlaw-adlaw nga bulohaton.

Sabat: 7. b) pagsunod sa pagtuytoy sang Balaan nga Espiritu sa adlaw-adlaw nga bulohaton.

Ang Gahum sang Balaan nga Espiritu sa Imo

Nahibaloan ni Ginuong Jesus nga ang Iya mga

sumolunod magakinahanglan sang gahum nga labaw pa sang sa ila kaugalingon, sa paghimo sang bulohaton para sa Dios. Gani, ginasugo Niya sila sa paghulat, tubtob mapun-an sila sang Balaan nga Espiritu agud mabaton nila ang gahum nga ila kinahanglan agud mangin saksi Niya sa bug-os nga kalibutan.

Kag sang nagapabilin upod sa ila nagsugo sia sa ila nga dili maghalin sa Jerusalem, kundi maghulat sang saad sang Amay, nga siling Niya “inyo nabatian sa akon, kay si Juan nagabautiso sa tubig, apang bautisohan kamo sa Espiritu Santo Apang magabaton kamo sing gahum kon ang Espiritu Santo mag-abot sa inyo; kag mangin saksi ko kamo sa Jerusalem kag sa bug-os nga Judea kag Samaria kag tubtob sa ukbong sang duta. Mga Binuhatan 1: 4, 5, 8.

Ini ang ginhambal ni Juan Bautista nahanungod kay Ginuonng Jesus

. . . Magabautiso Sia sa inyo sa Espiritu Santo kag sa kalayo. Lukas 3:16.

Buhata Ini

8. Basaha sing tatlo ka beses ang Binuhatan 1: 4, 5, 8.
9. Nagsiling si Juan nga si Ginuonng Jesus magabautiso sa
 - a) tubig sa paghinulsol
 - b) Balaan nga Espiritu kag sa kalayo.

Sabat: 9. b) Balaan nga Espiritu kag kalayo

Naghatag ang Libro sang Mga Binuhatan sa aton sang makakulonyag nga sugilanon kon pano gintuman sang Dios ang Iya mga saad sa adlaw sang Pentekostes, kag ang mga katingalahan nga mga hitabo pagkatapos sadto nga adlaw.

Kag napuno sila tanan sang Espiritu Santo kag nagsugod sa pagpamulong sa iban nga mga hambal, suno sa paghambal nga ginhatag sa ila sang Espiritu. Karon may nagpuyo sa Jerusalem nga mga Judio, nga mainampuon nga tawo gikan sa tagsa ka pungsod sa idalum sang langit. Kag nahiorungan sila tanan kag natingala nga nagasinilingay, “Indi bala Galileanhon ini tanan nga nagahambal?” Ginpamatian ta sila nga nagapamulong sa aton mga hambal sang dalagkung mga buhat sang Dios. Mga Binuhatan 2:4, 5, 7, 11.

Ining bautiso sa Balaan nga Espiritu ukon pagpuno sang Balaan nga Espiritu, ginatawag man nga Pentekostal nga eksperyensya tungod una ini nga natabo sa adlaw sang Pentekostes. Kon nagahambal ang isa ka tawo tungod sa gahum sang Espiritu Santo sa mga pulong nga indi niya mahibaloan, ginatawag ina nga *glossalalia*. Ining pulong sa Griego nagakahulogan *nagahambal* sa iban nga pulong. Kag ginatawag man nga *charismatic* nga nagagikan sa pulong nga *charisma* kon sayuron, hiyas. Kon sayuron ining hiyas nagagikan sa Balaan nga Espiritu kag isa ka

hitabo nga indi tawhanon kundi espirituhanon.

Buhata Ini

10. Ang bautiso sa Balaan nga Espiritu ginatawag nga
 a) bautiso sa lawas ni Kristo
 b) bautiso sa tubig
 k) eksperyensya Pentekostal
11. Ang paghambal sa lain nga pinulongan sa idalum sang gahum sang Balaan nga Espiritu ginatawag nga
 a) "glossalalia"
 b) "glossary"
 k) pagkasampon sa paghambal sa nagkalainlain nga mga pinulongan.

Sabat: 10. k) eksperyensya nga Pentekostal
 11. a) "glossalalia"

Nagsaad si Ginuong Jesus nga ang Balaan nga Espiritu magahatag sa aton sang gahum. May duha ka katuyoan ining gahum:

- ▲ Ang pagbulig sa aton sa pagsugid sa iban nahanungod kay Ginuong Jesus
- ▲ Ang pagbulig sa aton sa pagpangamuyo nga may resulta

Sa pagsaksi kag pagpangamuyo sang Kristohanon nga may gahum sang Balaan nga Espiritu, madamo nga makatilingala nga butang ang mahitabo bilang sabat sa pangamuyo. Kag madamo ang mga kalag nga magadangop sa Ginuo.

Apang si Pedro, nga nagatindog kaupod sang napulog isa, nagtib-ong sang iya tingog kag nagpamulong sa ila, . . . Gani ang nagbaton sang iya pulong ginbautisohan, kag may gindugang sa ila sa sadtong adlaw nga tatlo ka libo ka kalag. Mga Binuhatan 4:14, 41.

Buhata Ini

12. Una sa tanan ang bautiso sa Balaan nga Espiritu magahatag sang gahum sa Kristohanon sa
- a) pagsaksi para kay Kristo kag sa pagpangamuyo nga may resulta.
 - b) pagpakita sa iban sang ila pagka-espirituhanon
 - k) paghimo sing makatilingala nga mga buhat.

Sabat: 12. a) pagsaksi para kay Kristo kag sa pagpangamuyo nga may resulta.

Ini nga gahum mabaton man sang mga Kristohanon karon. Gikan sang pagsugod sang ika-20 nga siglo, minilyon ka mga katawhan, sa mga kasimbahanan sang nagakalainlain nga mga denominasyon, sa bug-os nga kalibutan, nakaambit sining eksperyensya nga Pentekostal sa bautiso sang gahum.

Kag si Pedro nagsiling sa ila, “Hinulsol kamo, kag magpabautiso ang tagsatagsa sa inyo sa ngalan ni Jesu-Cristo sa kapatawaran sang mga sala; kag mabaton ninyo ang dulot sang Espiritu Santo. Kay ang saad sa inyo kag sa inyo mga anak kag sa tanan nga yadto sa malayo, sa tagsatagsa nga tawgon sang Ginuo nga aton Dios sa iya. Mga Binuhatan 2: 38, 39.

Buhata Ini

13. Gusto bala nimo ining gahum sang Balaan nga Espiritu sa imo kabuhi? . . . Gusto bala nimo nga ang kalayo sang Dios magadabdab sa imo kalag, agud mahapos sa imo ang pagsugid sa iban nahanungod sa Ginuo? . . . Gusto bala nimo nga ang imo pangamuyo may resulta? . . . Ining makatilingala nga eksperyensya Pentekostal para sa imo. Pangayoa sa Dios nga bautisohan Niya ikaw sa Balaan nga Espiritu.

Mga Hiyas sang Espiritu

Buot ni Kristo nga ang Iya Iglesia mapun-aning gahum. Gani naghatag ang Balaan nga Espiritu sang pinasahi nga mga hiyas kag mga ika-sangkol sa tagsatagsa ka katapo. Sa sini nga pagi ang tagsa ka katapo may bahin sa bulohaton kag pagtubo sang Iglesia.

Karon may nagakalainlain nga mga hiyas, apang isa ka Espiritu; sa tagsatagsa ginahatag ang pagpahayag sang Espiritu nga sa kapuslanan sang kadam-an. Ini tanan ginabuhat sang isa kag amo nga Espiritu, nga nagapanagtag sa tagsatagsa suno sa iya ginabuot. 1 Mga Taga Corinto 12: 4, 7, 11.

Buhata Ini

14. Ang mga hiyas sang Balaan nga Espiritu para
 - a) lamang sa mga apostoles sang nahaunang Iglesia.
 - b) lamang sa mga manugwali.
 - k) sa mga katapo sang iglesia karon.
15. Magpangamuyo, nga padayunon sang Dios ining Pentekostal nga pagkapukaw sa Espiritu sa bug-os nga kalibutan.
16. Magpangamuyo nga ang Balaan nga Espiritu magahatag sang Iya mga hiyas sa mga katapo sang inyo iglesia.
17. Karon sulati ang imo Rekord sang Bumolutho para sa leksyon 7.

Sabat: 14. k) sa mga katapo sang iglesia karon.

PAGPAKILALA sang LEKSYON 8

May nakapalapit na bala sa imo nga nagasiling nga nagbalhin ka na gid gikan sang imo pagkaluwas? Ukon natalupangdan bala nimo nga indi ka na kasubong sang una? Ang Biblia nagasiling, “Sila nga yara kay Kristo mga bag-o nga tinuga. . .” Gani indi ka magkatingala kon ngaa indi ka na katulad sang una – ang imo kabuhi isa na ka suga nga nagasiga. Magadugang pa gid ang imo ihibalo kon ngaa nga may kabalhinan sa imo samtang ginabasa mo ang leksyon 8, nga ginatig-ulohan, “ANG IMO KABUHI ISA KA SUGA”.

Sa leksyon 7 natun-an nimo kon paano ang Balaan nga Espiritu makabulig sa imo nga magmangin mabaskog nga Kristohanon. Karon, ang leksyon 8 magapakita sa imo sang mga paagi sang plano sang Dios sa imo kabuhi. Matukiban nimo kon ngaa nga naghigugma ang Dios sa imo kag ngaa nga ginhatag Niya ang Iya kaugalingon para sa imo.

Ang pagtawag kag tinutuyo sang Dios para sa imo kabuhi magmangin mas maathag pa sa imo samtang nagapadayon ikaw sa pagtuon sa ICI.